

Rēzeknē radeita eipaša kopeja kulturvīta

Oskars i Jolanta Maculeviči turpynoj atteisteit kopeja “KUUP” stuostu

Inga Kaļva-Miņina

Jau vaira kai treis mienesūs Rēzeknē ir īspieja baudeit gordu Latgolā grauzdātu kopeju eipašā vītā – kopeja konceptveikalā “KUUP”. Kopeja grauzdātovys “KUUP”, kas ir pyrmuo kopeja grauzdātova Latgolā, saiminīki OSKARS i JOLANTA MACULEVIČI itymā godā ir pīpīldejuši vieļ vīnu sovu īceri – radejuši pyrmū Latgolys kopeja kulturvītu. 22. febraļs niu jim ir dubultsvātki, deļ tam ka gon kopeja konceptveikals, gon kopeja grauzdātova (2019) taišni itymā datumā uzsuoka sovu dorbu. Kaidi ir bejuši pyrmī treis mienesī, dorbojūtīs jaunajā sferā, par tū ir myusu saruna ar Oskaru.



22. febraļs Jolantai, Oskaram i jūs komandai, kurā dorbojās cylvāki gon nu Lendžu, gon nu Rēzeknis, beja dubultsvātki – 2019. godā itymā datumā Lendžūs tyka atvārta kopeja grauzdātova, a itūgod Rēzeknē – kopeja konceptveikals



Kopeja konceptveikals «KUUP» i kebabneica «Ausmeņa Kebabs» kūpā veidoj gaumeiģu vītu, kur var atsapyust i baudeit gordu iedīni i kopeju



Tān Rēzeknē var na tikai nūpierkt «KUUP» kopeju, bet ir ari vīta, kur pasēdēt, izdzert itū gordū dzierīni i vieļ palutynuot sevi ar kaidu gordu buļceņu. Kai sarunys nūslāģumā soka Jolanta, tod par kopeja konceptveikalu «KUUP» jau runoj, ka ite asūt piļsātā gorduokuos kanelmaizeitis (ite var tikai pikrist, turkluoit eipaši gordys ituos maizeitis ir tod, kod vieļ pavysam syltys)



Taipat Jolanta atkluoj, ka par kopeja konceptveikalu «KUUP» cylvāki soka ari, ka tei asūt *instagrameiguokuo* vīta piļsātā (asūt pat bejušs taidi gadejumi, kod cylvāks iit īškā tikai deļ tam, lai uzjimtū biļdi, kū izlikt socialajūs teiklūs)



Nalela daļa nu tuo, kas apsaverams i nūpierkams kopeja konceptveikalā

«KUUP» – Latgolā grauzdāts kopejs

Jaunuo kopeja kulturvīta ir lykumsaka-reiģs Oskara i Jolantys sapņu turpynuojums. Kod dzeive Reigā ar sovu īrostū kasdīnys ritmu vairs nalykuos taida, kai grybātūs, roduos ideja braukt atpakaļ iz dzymtū Latgolu i eistynuot itam regionam narakstureiģu biznesa ideju – Rēzeknis nūvoda Lendžu pogostā atvērt kopeja grauzdātovu. Sasadorbojūt ar latgališu rakstniķu Oskaru Orlovu, kotram «KUUP» kopejam ir radeits ari sovs eipašs stuosts latgališu volūdā. «Daudzi prosa, par kū kopeja nūsaūkumi i stuosteni ir latgaliski? Tys ir deļ tam, ka sovaiduok nimoz navarēja byut. Latgalītis grauzdej kopeju Latgolā, tān ite ir kopeja kulturvīta. Latgaliskais mums ir jau ašņī,» soka «KUUP» saiminīks. (Te vītā atguodynuot, ka par latgaliskuo popularizeišonu kopeja grauzdātovys saiminīki ir sajāmuši Latgališu kulturyš goda bolvu «Boņuks 2019».)

«Treis godu laikā “KUUP” – gordys, ar mīlesteibu Latgolā grauzdāts kopejs – gon garšys, gon vizualuo nūformiejuma dieļ i klivs par eipašu Latgolu popularizejēšu zeyminyu. Ja da šam kopejs beja nūpārkams dažaidūs veikalūs, tod tān tū var nūpierkt i īpat iz vītys ari izdzert, izbaudūt atmosferu eipašajā kopeja kulturvītā Rēzeknē.

Kai stuosta Oskars, tod kopeja konceptveikala atvieršona bejuse jauns izaicynuojums. Jau kopeja grauzdātova i ekskursantu uzjīmšona i īpazeistynuošona ar kopeja pasauli beja nūzeimeiģs syls i sova veida liecīns nazynamajā. Bet jaunuos idejis realiziešona uzlik arviņ jaunus pīnuokumus. «Niu mes asam ultra atvārti i publiski, i ari uzdavumu ir daudz vairuok. Mums ir na tikai veikals, bet papildus ari ādnyuošona i konditoreja. Tys lik padūmuot i pastruoduot,» soka Oskars, atzeistūt, ka byut pīeejamim kotru dīnu, na tikai piec pīroksta (kai tys ir kopeja grauzdātovā), beja nūzeimeiģs i jau kaidu lobu laiku izlūluots lāmums.

Atcerūtīs pyrmū kopeja konceptveikala atvieršoys dīnu, Oskars soka, ka bejs daudz dorba i bejs lels priķs par daudzajom pozitivajom atsauksmem – na tikai nu zynomim, bet ari pavysam napazeistamim cylvākim. Ari Lendžūs vyss turpynoj nūtik – teik grauzdāts kopejs, majā jau atkluota ekskursantu sezona i kūpā ar kopeja interesentim kūpeigi teik izzynuota kopeja pasaule (kopeja grauzdātovys «KUUP» apmekliejums ītver: Latgolys kopeja stuostu, kopeja grauzdiešonys procesa demonstriejumu, kopeja degustaceju i kopeja īģuodi).

Konceptveikals ļaun byut daļai nu kopeja kulturyš

Kai rodās dūma, ka tys byus taišni konceptveikals? Oskars atbiļd, ka cytaižuok i byut navarēja: «Gribējuos paruodeit, kai tod mes radzam tū kopeja atteisteibu Latgolā. Tys vuords – konceptveikals – vysu jau ari pasoka, – konceptveikals ir vīta, kur tu vari īpazeit Latgolys kopeja kulturu. Prūtams, veikala funkceja nav zuduse, ite vari īsaguo-duot vītejūs keramiķu, muokslinīķu dorbus. Ir interesantys sadarreibys, pīmāram, konceptveikalā var nūpierkt kūka karūtīs, muola kryuzeitis. Cylvāki padora itū vītu unikalu.»

«Taipat ite vari sev atlaseit na tikai vītejūs ražuotuoju precis, bet ari pasaulē pazeistamus brendus, saisteitus ar kopeju, pīmāram, kopeja bryuvreiki «AEROPRESS» voi «Chemex», kas pazeistami vysā pasaulē. Asūt ite i nūpierkūt ituos precis, tu vari buyt daļa nu tuos kopeja kulturyš. Itys vyss mikss ari veidoj tū kopeja koncepta veikalu,» turpynoj Oskars.

Juouzsver, ka kopeja konceptveikals at-sarūn sūpluok Rēzeknis kebabneicai «Ausmeņa Kebabs», obom vītom ir kūpeiga uora terase, i obu āķu fasāde ir nūkruosuota tai, ka iz reizis var redzēt – ir īturāts vīnuots stils, rodūt piļsātys centrā eipašu vītu, kur var atsapyust.

«Man likās, ka iz rūkys pierstim var saskaiteit, kur Latvejā ir taidi uzjāmumi, kuri sasadorboj sovā storpā, navis konkurej. Āķys fasāde ir saskaņuoatā tūnī, mums ir kūpeiga terase, vari pajimt kebabu i izdzert kopeju,» soka Oskars.

Jaunuo konceptveikala dorba laiks ari pīsaista uzmaneibu – pyrmudīne ir breiv-

dīna, dorbadīnuos struodoj nu plkst. 7.30 da 19.00, bet breivdīnuos nu plkst. 10.00 da 18.00. Kod soku, ka laikam nazynu ni-vīnu taidu ādnyuošonys īstuodi, kas struodoj jau tik agri nu reita, tod Oskars atbiļd: «Nui, tys otkol ir kas piļneigi nairosts. Mes taidi asam. Izdūmojam vysaidys idejis, i tod mie-ginojam tuos eistynuot, sarežģejūt sev dzeivi. (*Smejās.*) Nu suokta gola jau gri-bieju, ka cylvāki agri nu reita varātu īsuokt sovu dīnu kvalitativi i ļaudeigi – pajimt nu reita kopeju, brūkašks i dareit tuoluok so-vys dīnys lītys.» Juouzsver, ka kopeja kon-ceptveikalā var nūpierkt na tikai kopeju i kopeja bryuvejamūs reikus, bet ari buļcenis, svīkstmaizis, piec pasyutejuma – ari tortus. I vysi itī gordumi ari tūp tepat iz vītys.

«KUUP» grauzdātais kopejs ir pī-ejams sešu dažaidu veidu – «Jezupa Etio-pejis sapyns» «Kolumbejis flirts», «Brazi-lejis nakts», «Pynaklu Jurs», «Malnais On-tons» i pats jaunums – «!Hola! Doloresa», kas ir bezkofeina kopejs nu Meksikys, i tū drūši var dzert jebkurā laikā, koč voi des-mītūs vokorā i jau catūrtū kruškeņu.

Ir svareigi izgleituoit cylvākus par kopeja pasauli

Daleiba dažaidūs projektu konkursūs paleidz uzjāmumam augt i pylnveiduotīs. 2020. godā pīsadolūt Rēzeknis piļsātys dū-mis izsludynuotajā konkursā, SIA «Kuup Coffee» projekts par specializāta kopeja i bryuvreiku veikala telpu lobīkuortuošonu giva ari atbolstu. «Paļdis Rēzeknis dūmei, pīsadolūt konkursā, dabuojam projekta lei-dzekļus telpys lobīkuortuošanai. Taipat paļ-dis biznesa inkubatoram, kurā asam jau pā-

dejū catūrtū godu. Četri godi paskriejušs, i var saceit, ka kotru dīnu ir priķs, ka esi in-kubatora daleibnīks. Na tikai granti, finan-sials atbolsts, bet ari apvuceibys i daudz kas cyts nūdereiģs ir tys, kas paleidz augt,» soka Oskars. «Bez ituo atbolsta eistynuot vysys idejis vīnam pošam – tys ir praktiski naišpiejami.»

22. febraļs ir «KUUP» dubultdzimšonys dīna – svātki kopeja grauzdātovai i niu ari kopeja konceptveikalam. «Ītuos telpys pa-jēmēm, i nuokamajā mienesī suokās kovids. Beja ari taidys laiks, kod lykuos, ka nikas, kū esi izplānuojšs, nasaīs. Pusgoda laikā ir ļuoat-ver veikals, bet nu tevs naatkareiģu apstuok-ļu dieļ navari atteisteit sovu biznesu. Tod suoc dūmuot, ka varbyut i navāģa. Bet nu itys periods ir puorvarāts,» atsacer Oskars.

Voi gribīs atpakaļ iz Reiģu, kur beja konkrets dorba režīms? «Godā nedeli var-byut grybātu padzeivuot īpriškejā ritmā. Tei ir nostalģeja – vokorā iz sātu, vari at-sapyust, nadūmuot par dorbu. Bet, lai pa-vysam puorsacaltu iz Reiģu, – nā. Ir sovi izaicynuojumi, ir gryuts, tūmār te ir muna sāta,» gūdeigi nūsoka Oskars.

«Mums ir daudz dažaidu ideju, jū vai-ruok dori, jū vairuok ir ideju,» par jaunim plānim soka kopeja konceptveikala saimi-nīks. «Bet paraleli vysam ir ļuostruodoj pi cylvāku izgleituošonys par kopeju, tuo pa-gatavuošonu. Mums ir divi ideju «grū-zi» – «grūzs», kurā ir idejis, kas skaņ labi, bet nastruodoj, pylduos daudz uotruok na-kai «grūzs» ar idejom, kū varātu realizēt. Mums paleidz īģiutuo uzjiemiejdarreibys pīredze, kas ļaun lobuok saprast, kai var eistynuot īcarātū.»

Piļsātys īdzeivuotuojim i gostim pateik jaunuo vīta. Kai stuosta riezekniģs Imants, tod «KUUP» kopeja koncepts jū ciši uzrunoj: «Lai ari faktiski mes varam īsaguo-duot kopeju nu jebkurys pasaulā molys, «KUUP» zyna, kai tū lokalizēt vītejam tiergam, padareit Dīnvidamerikā i Afrikā augušu kopeju par sovejū, latgaliskū. Konceptveikals tam ir tikai kai, munupruot, logisks turpynuojums – kab pi latgaliskuo, jau zynomuo kopeja varātu atīt gostūs. Priķs, ka Rēzeknē pasaruoda arviņ vairuok interesantu vītu, kurom ir sovs stuosts, interesants interjers, ideja, kas īt tuoluok par «paēst-padzert», i, ja tai var saceit, veic ari sabīdreibys informejūši-audzynūšu funkceju. Kopejs i iedīni ite ir gordi. Kopejs ite vīnkuoŗši navar byut švaks, bet buļcenis ir atseviška ituos vītys muokslys forma.»

«Projektu finansē Mediju atbalsta fonds no Latvijas valsts budžeta līdzekļiem». «Par projekta raksta «Rēzeknē radeita eipaša kopeja kulturvīta» saturu atbild SIA «Vietējā».

MAF
Mediju atbalsta fonds